

## **Ptače stawiznički – čorna sykorka**

Zawěsće znaje kóždy z was čornu abo wulku sykorku. W zapiskach ptačich mjenow Jana Radyserba-Wjele sym za nju tež drje starše mjeno “čornačk” namakał.

Před 150 lěty pisaše serbski přirodospytnik Michał Rostok wo tutym ptačku, zo “hnězdzi w prózdnych štomach, lehnje dwójce za lěto a njese kóždy raz 8 do 12 běłych, čerwjeno-brunje dypkowanych jejkow”. Čitach pola Rostoka tež, zo “žerje wulka sykorka nimo překasancow tež wšelake symjo, samo mjaso, wosebje mozy mjeńšich ptačkow, kotrež nadpaduje”. To z mjasom a mozami njejsym jemu wěrić, tola tež w dźensnišej wikipediji steji, zo so čornački w času nuzy do mjeńšich ptačkow abo njetopyrjow dadža. Zo njebychu to trjeba měli a stajnje dosć městnow k hnězdženju namakali, su stare sadowe plantaže a na našich sadowcach přičinjene kukawy wažne.

Hdyž čorne sykorki swojemu dorostej picu do kukawy noša, njewotleća z prózdnym pyskom. Dyrbja tola wot młódzátow do hněžka položene kołbaski wotstronić.